

## L' añ 1912

ie n' añ balöst da 366 dis;  
'l di 24 de Faurè ie de plu.

### Cater-tèmpora ie-l:

ai 28 de Faurè; al prim y ai doi de Mèrz.  
ai 29 y 31 de Mèi y al prim de Guni.  
ai 18, 20 y 21 de Setèmber.  
ai 18, 20 y 21 de Dezèmber.

### Del giaḡūn.

I dis ch'à na crēuṣ y na stēila († \*) ie-l pruibì de majē cērn y de se pašentē plu de n'jēde al dí.

Chis dis ie: Capión; i vēnderdis de Curēisma y del Avēnt; i trēi ūltimi dis del' òna santa; Miērculdi, Vēnderdi y Sada de Cater-tèmpora; la ueia de Pasca de Mèi, de s. Piere y s. Paul, dela gran santa Maria, d'Ugnissánt y de Nadèl; i Miērculdis del Avēnt.

I dis ch'a na crēuṣ (†), ie-l pruibì dē majē cērn. 'L ie: duč i autri vēnderdis del añ.

I dis ch'à na stēila (\*) ie-l pruibì de se pašentē plu de n' jēde al dí. 'L ie: i dis de Curēisma, tēut'òra la dumēnia

### Tabōla dela fōstes che muda.

Añ.	Capión	Dum. de Pasca	G̃uebia del del Aufertog
1913	5 de Faurè	23 de Mèrz	1. de Méi
1914	25 de Faurè	12 d'Auril	21 de Mèi
1915	17 de Faurè	4 d'Auril	13 de Mèi
1916	8 de Mèrz	23 d'Auril	1. de Guni
1917	21 de Faurè	8 d'Auril	17 de Mèi
1918	13 de Faurè	31 de Mèrz	9 de Mèi
1919	5 de Mèrz	20 d'Auril	29 de Mèi

Añ.	Dumēnia de Pasca de Mèi	G̃uebia dai Andli	1. Dumēnia del Avēnt
1913	11 de Mèi	22 de Mèi	30 de Novèmber
1914	31 de Mèi	11 de G̃uni	29 de Novèmber
1915	23 de Mèi	3 de G̃uni	28 de Novèmber
1916	11 de G̃uni	22 de G̃uni	3 de Dezèmber
1917	27 de Mèi	7 de G̃uni	2 de Dezember
1918	19 dē Mèi	30 de Mèi	1. de Dezèmber
1919	8 de G̃uni	19 de G̃uni	30 de Novèmber



## 'L calënder a duč i Ladíns y mašima a chëi de Gherdëina.

L' aň passà sons cumpari 'l prim jëde al mont y m' è pre-  
sentà pitl y stletòt dant al dut a vo de Gherdëina. M'ëis tëtut  
sú cum bõna maniera y ëis cialà chi che son; ma se sà che sten-  
tais 'm pue' a me cunëser y a me 'ntënder, še bën che rušnòve  
per gherdëina y ve cuntòve šaldi ròbes de Gherdëina. Ne m'è  
fat per auter deguna maruëia: fòve furni 'm pue' da tudësc  
y ne ve cialòve nia òra bøl a scusa y a vòš. muet. Y pò  
savëis bën, che 'l prim jëde che 'η va te na cësa o danter  
gënt, s'astiel-uη per 'l plu 'm pue' da cëšer, davia che 'η ie fòter  
grames, še bën che ne fossa deguna gauša da messëi se temëi, y  
mò mancul te Gherdëina, ulà che 'η n'i fës nia a deguni, y a 'n  
pitl calënder pò gor no.

Chëst jëde è-i bôle 'm pue' plu curagio a unì pra vo; spøre  
che me cunëšëis y me 'ntendëis plu sauri, davia che cël' òra plu  
da Gherdëina y che pudëis me lieğer y me 'ntënder zënza messëi  
studië dò 'm pöz ala longia. La scrittura tira plu dò 'l talián,  
še bën chë nëus de Gherdëina ne son Taliani, ma Ladíns.

Tulë-me, ligë-me y purvëde de scri 'nstëš da-trai n' jëde vëlç  
per gherdëina. Y chi che giatëis òra vël defòc te cheš pitl ca-  
lënder, vëlç che fossa da mudë n' auter jëde, che dësse inò uni  
drucà, cialëde de 'l fé al savëi a chëi che m' a metù adúm. 'L  
ne fòva-pa degún gspas a me mëter adúm y me fë sú y me regulë,  
cò che toca, a pudëi cumpari furni al mancul 'm pue' da galantòm  
danter gënt.

Chest aň che vën uel-i-pa bën me furni sú da sandí, še mia  
mèi ch'i à 'l muet y che la me va bõna chest aň, percie che a  
me šichë òra š'che s'aut, coste-l 'n gran lëur.





## Cie sons-a nëus Ladíns?

Giut ala longia nen à-η sapù, pra cie pòpul, pra cie naziòn ch' i Ladíns aut; un minòva 'nši, l' auter autramènter. Dela stòria di vòdli tèmps ne savóns tan nia, che ne pudón dì, ce gènt che vivòva dan doi mil' ani te nòs lueš. Y pervia de chël à-η for mè messú se tò gú dal linguáš, a ce pòpul che pudessán i purteni 'l plu.

Al dí da 'ncuei savóns bèn duč, che nòsta rusnèda ie, drè' šiche la taliana o la franzèusa n' arpešón ch' on giatà mò dai vòdli Romani, che rusnòva latín y che fòva zacán patróns de duta l' Italia, la Franzia, la Spagna y de nòs lueš y mò de 'n grum d'autri; y savón che nòsta rusnèda ie na fia, pò-η dì, del latín, dunque na sòr del talián y del franzèus, y no na fia dela rušnèda taliana, šiche i Taliani diš mò suènz 'ncuei cun dí. I diš, che nòsta rušnèda ie unida dal' Italia y che son Taliani. Danz che la ie unida dal' Italia: chëi che rušnòva zacán latín, stašòva i primes tèmps tel' Italia y s' a pò sparpagnà òra sèura dut 'l mont ch' i cunešòva 'nlèuta. A chësta mòda messèssa pò i Taliani 'nce dì, che la rusnèda franzèusa y spagnòla ie fiáns del talian, che 'l ie dialèč taliani, šiche i diš di ladíns. Ma i ne 'l diš, ch' i se fašèssa cuienè. Y 'nši ie-la drè' cul ladín. Dlonc unive-l rušnà latín, per ešèmpio dan doi mil' ani; ma tel' Italia fòve-l tël gènt che 'l rušnòva, y cul tèmp ie-l diventà 'l talián da-in-òra; tela Franzia fòve-l d' altra gènt ch' à mparà a rušnè latín y 'l ie diventà 'l franzèus da-in-òra; inò d' altra gènt tela Spagna y inò d' altra pra nëus, y 'nši ie diventà 'l spagnòl y 'l ladín.


Y duč i Ladíns, che stašòva zacán, mò dan 500 o 400 ani, te duč i lueš dala Sbízera: ca per 'l Tirol 'nfin gú tel Furlán y che rušnòva unfat, pudèssa avèi al dí da 'ncuei duč una scrittura, che duč savèssa da lieđer y da scri y 'nce da rušnè drè' šiche i Taliani o Franzèuš, še ne fossa stat chiš gran crèps ch' i despartèš valèda per valèda y še i fossà stai duč pra 'l medòmo rēni 'mpò de pra trēi: Sbízera, Austria y Italia. Y pervia de chël mašimamènter à pedù i Tudēs da una pèrt y i Taliani dal' altra revè for plu inánt te lueš che fòva dant ladíns, y ons al dí da 'ncuei trēi partidas de Ladíns 'mpò d' una. Gran èura, mašima per nëus Ladíns del Tirol, de teni adúm y de se recurdè ch' on frèdeš tela Sbizera

y tel Furlán, še no unirà-l ngali 'l tēmp, che tel Tirol nen ie-l plu degún Ladíns.

Cialē-i ai Ladíns dela Sbizzera: tlo ie-l na chemún catòlica ch'à tēl usanzas y tēl minonghes, dlongia n-ie-l na luterana cun d' altra peniòns y d' autri costumi: y 'mpò sa-i y se recòrd-i duč, ch'i ie Ladíns, ch'i toca da tenì adúm y tēn nce adúm: ēi ie na naziòn per sè, ne se mešēida mèi te vèl strìc o batalies danter una naziòn y l' altra, y 'nce i autri i laša 'm pèš. Duč i respetōia y i uel bon y cun ugni naziòn se vègn-i. Dād ēi pudòns y messòns 'mparè nēus Ladíns del Tirol. Duč: Gherdēina, Fašáns, Badiòc, Fedómes y Ampezáns tucón adúm y fašessán òra na bōla gran familia. On da fè cun Tudēs y Taliani, y 'mparón 'nce drèt sauri 'l tudēsc y sa-ŋ bēn 'l talián. Ma perchēl nen ons drē' de se desmenciē 'l linguáš ch' on 'mparà dal' oma, y ne daussón mèi se daudè de vōster Ladíns. Che messón for pessè y se lecurdè, che 'l ie iust nòsta rušnèda fata al dò che 'mparón plu sauri l' autres; n-ie sta tanč ch' à bōle dit chēs y bèra Franzl da Linèrt 'l à ēnche scrit te si liber de Gherdēina. Y 'l udón bēn 'nstēs: metēde mè 'n Talián y 'n Ladín, magari un de Gherdēina, che rešona tudēsc, adúm. Chēsta virtù ons cun duč i Ladíns, Sbizeri y Furláns, y de chēsta messòns savēi gra a nòsta rušnèda nativa. Y gā ch' on una rušnèda, messòns nēus Ladíns del Tirol tenì adúm, pò aróns fòrza, pò pudòns 'nce pertēnder d' unì cumpedēi psunder tel Tirol y no for metui adúm cui Taliani, šich' i à fat 'nfin a mò. Ne teniòn no cui Taliani no dai Tudēs, lašón ch' ēi se-la strite òra, y deguni ne puderà nes tò la rešón de vōster nēus na naziòn per sè. Y pò pudòns di ch' on tan de fòrza y de rešón che nòš frēdeš tela Sbizzera y tel Furlán y pudón pertēnder chi'i se recòrde 'nce de nēus, ēi ch' i ie de plu de cumpēida y ch' i à abù na lingua scritta dan nēus.

A. L.





## 'L vödl mut.

(Dò na copia de W. Moroder).

- I. N-ëss' giapà bën cënt per una,  
Ma scusà ne m' à mèi deguna;  
Mè na böna è-i zercà,  
Ma na tèla n' è-i giapà.  
Je lašëss' inánt la tèsta,  
Che me tò na tèl rie pèsta,  
Che me dà 'n tèl guiërn,  
Šiche fosse tel infiërn.
- II. Mi mutóns! ëis bën la vèles,  
Cri-vè riches o de böles;  
Je per mè, je laše stè,  
Y inchèghe al maridè.  
Sálonon diš: Dut ie aitl,  
Auter che s' en böver 'n žaitl;  
In chëš cont à-l bën rešón,  
In chëš cont nen ie-l minción.
- III. Tan acòrt che chëš rë fòva,  
N' ie-l mèi stat y plu s' en tròva.  
La fenáns pur 'l à giapà,  
Èiles 'l à mò ingianà!  
Še fin Sálomon n' i mucia:  
Ve farà-les a vo na pucia?  
Mè fašë-i 'n drë mus dur,  
Še no ve giap'-les tan segúr.
- IV. Fina Ġan dala Rainöles  
Ne dà achter ala böles;  
Èl ti cigna prëst de no,  
Y stluš mò i uedli prò!

Še dišeis d' en tò de riches,  
Ve darà-l de bur gran pliches,  
Žarerà i uedli prò,  
Cignerà da nuef de no.

V. Les ve fèš tel prim la tlòza,  
Ma spitède dò la nòza,  
Audirèis tòst 'n bōl spas,  
Can che les vèn cul gran šadás.  
Še ne ti dèš bōl prèst la brèies,  
Audirès-te tòst de bieì svèies:  
Chèstes aut pu mè a mi,  
Tue! 'l chitl te dè-i a ti!

VI. Še tu nen ues, la te minciona;  
La dirà: Je son patrona,  
Ne me ciaculè debánt,  
Je cumande, tu ies fant!  
La mobilies ie dutes mées,  
Ma la criatures tées.  
Tu ies sèul a davagnè,  
Y je sès che ue majè!

VII. La dirà: 'L ie zèn la mòda,  
Che 'ŋ èuta 'ntèur la ròda!  
Caro tu! Ès intendù?  
'L šadás èš bèn udù!  
Še ne te stès bōl sot mi zòchi,  
Cul šadás arès ti còchi!  
Chèl ch' je ue, èš da fè,  
Chèl che n' ue, èš da lašè!

VIII. A San Job, diš la scritura,  
Ie - la ġita ènche dura. —  
'N se muessa spaventè,  
A pensè al' maridè. —  
Si rie fèna 'l tramentòva,  
'L minaciòva y i dašòva;  
Y per dè a 'n sant custúm,  
'L à-la trat mò sul chetúm.

IX. Še i sanč nèn ie segures,  
Can che 'l va drèt ala dures,  
Ve ulèise ġmò 'nfidè,  
Mi mutóns da maridè?

Wenn ihr sagt, daß ihr reiche heiratet,  
Wird er euch große, böse Blicke zuwerfen,  
Wird die Augen schließen  
Und neuerdings den Kopf schütteln.

V. Anfangs tun sie euch schön,  
Aber wartet nur bis nach der Hochzeit,  
Ihr werdet bald einen schönen Spaß erleben,  
Wenn sie mit dem großen Nudelwalker kommen.  
Wenn du ihr nicht sofort die Hosen gibst,  
Wirst du bald ein schönes Gezeter hören:  
Die gehören ja nur mir,  
Nimm! Den Rock gebe ich dir!

VI. Wenn du nicht einwilligst, beschimpft sie dich;  
Sie wird sagen: Ich bin Herrin,  
Schwätze mir nicht nutzlos!  
Ich befehle, du bist Knecht!  
Die Möbel gehören alle mir,  
Aber die Kinder dir.  
Du mußt allein verdienen,  
Und ich, das weißt du, will essen!

VII. Sie wird sagen: Es ist jetzt Mode,  
Daß man das Rad umkehrt.  
Mein Lieber! Hast du verstanden?  
Den Nudelwalker hast du schon gesehen!  
Wenn du nicht schön unter meinem Pantoffel bleibst,  
Wirst du mit dem Nudelwalker deine Prügel bekommen.  
Was ich will, hast du zu tun,  
Was ich nicht will, hast du zu lassen!

VIII. Dem hl. Hiob, sagt die Schrift,  
Ist es auch schlimm ergangen; —  
Man muß erschrecken,  
Wenn man ans Heiraten denkt. —  
Seine böse Frau quälte ihn,  
Bedrohte und schlug ihn,  
Und, um einen Heiligen zu erziehen,  
Hat sie ihn auf den Düngerhaufen geworfen.

IX. Wenn die Heiligen nicht sicher sind,  
Wenn es zum Äußersten kommt,  
Wollt ihr es noch wagen,  
Ihr ledigen Burschen?

Pier' o Paul, metêde vèrda!  
Sul chetúm o tela mèrda  
Ve trarà-les trame-doi,  
O defín te chègadói.

X. Ès assè dinèi y mitli:  
Can che t'ès cinc, sies, söt pitli,  
Can ch' i vèn-pa dô svajàn:  
Tata, mama, je ue pan!  
Cò i darès tu assè pulènta,  
Can che t' ès na bòla gran stènta?  
O! dirès, puere cutèl!  
'L maridè ie 'l mađer mèl.

XI. Laše prò che t' ès na rica,  
Drèt supërba che se šica;  
La dirà: Dà ca dinèi.  
Y te 'n bòt sarà-i finèi.  
Ès fiáns, drèt flinches, blòtes,  
Damanderà-les tòst la dòtes;  
Y mutóns che uel balè —  
Tè te laš-i-pa bradlè!

XII. Cri-ve pu tèl bòla Bòtes,  
Arèis tòš sul cè curnòtes;  
Cri-ve pu de vòš gust,  
Ugnuna à si fust.  
Chi 'n uel longes, chi 'n uel curtes,  
Chi 'n uel fošes, chi 'n uel burtes,  
Ma ugnún n - arà assè —  
Je per mè les laše stè.  
Èiles me dirà del dut,  
Ma je röste vödl mut.





Peter oder Paul, gebet acht,  
Auf den Düngerhaufen oder in den Kot  
Werden sie euch beide werfen,  
Oder gar in den Abort.

X. Hast du Geld und Mittel genug:  
Wenn du fünf, sechs, sieben Kinder hast,  
Wenn sie dir nachlaufen und schreien:  
Papa, Mama, ich will Brot!  
Wie wirst du ihnen Polenta genug geben,  
Wenn du in hübsch großer Not bist?  
Ach, wirst du sagen, armer Mann,  
Das Heiraten ist das größte Übel!

XI. Ich gebe zu, du hast eine reiche,  
Recht stolz, die sich putzt;  
Sie wird sagen: Gib Geld her!  
Und im Nu wird es alle sein.  
Hast du Töchter, recht flinke, hübsche,  
Werden sie bald die Mitgift verlangen;  
Und Söhne, die tanzen wollen —  
Dich lassen sie weinen.

XII. Sucht euch nur so schöne Lisbeth.  
Ihr werdet bald Hörner auf dem Kopfe haben;  
Sucht sie euch nach eurem Geschmack,  
Jede hat ihren Stock;  
Der mag lange, der mag kurze,  
Der mag schwarze, der mag häßliche,  
Aber jeder wird genug haben daran, —  
Ich für meinen Teil, ich lasse sie bleiben.  
Sie werden mir alles mögliche nachsagen!  
Aber ich bleibe Junggeselle.



# La stòria de' n vödl y de si mušát.

(Metud' òra da Segnëur Batista.)

Zacàn fòve-l 'n bon vödl, da-ugìn da utant' ani, griš, sà-η bën, y las; 'l udòva fòter puec y audìva mò mancùl; pò òve-l mò tan d' autri deföc, che 'η à, can che 'η ie vödli. Ma del röst s'en stašòve-l bën; 'l fòva anzi 'l mađer paura del luec. 'Nchina mò òve-l vivù zënza tan de pensieres y festideš, bøl chiet y cuntënt, y davia de chël fòve-l unì tan vödl. 'L fòva pò 'n drë bon crestián, 'n gran amic di pröveš y di capuzíneri; y can che i univa a petlè, i dašòve-l for de bõla gran turnèdes de smauz; per chël òve-l 'nce la benedešión te cësa y dlonc òra per si campagna.

Ma audíd'-ma cò che la i ie suzeduda n' jëde. 'N dí òve-l ciarià sú si mušát per menè na sama de uele te na cësa de' n gran segnëur, bën de bõ da lonč da si paòš. 'L se mët 'n streda, va bøl plan dan òra, y se tira dò 'l mušát tela ciavazina; ugne tant muesse-l petè 'n pitl svèi y trè 'm pue' plu tel zigl, che 'l s' òva menà 'ntëur la man drëta, argá che ch'la frëda de na bõsta univa tan plan dò y s'ëssa gën fermà ugne mumënt. 'Nši va-l bøl plan inánt zënza cialè no ca, no dla, mè-drë 'nši sëura pensier, y ruva 'ngalin te 'n bòsc. Ta möz 'l bòsc, pròpi ulà che 'l fòva 'l plu toc, stašova trëi capuzíneri schendui danter i rames y la daša; i teniva i braces 'n creùš sul piet, 'l cë dan gù, y sëura-via s' òv-i tra la capuza. Ala semöia paròve-l trëi bon coši, adòs de puere grames, anzi schëse trëi vöre eremíč. Vo minerëis, che chiš trëi capuzíneri sibe stač iló a cunšidré 'l ciel y la stëiles, y a fè penitënza. Ma dëss-i pròpi ve-l dì, chi che 'l fòva, y per cie ch' i stašova 'nši iló? 'L fòva trëi lèreš, furní da capuzíneri, y i stašova iló a passenè sú a gënt per pudëi i scašinè òra.

Èco, zën ruva iló nòš bon vödl cun si mušát, tan dala me-sëria, che 'l èss' menà picia a duč auter ch' a 'n lère furní 'da capuziner. Ma la vöciáia de ch' l bon còšo i à 'mpò fa 'm pue' de 'mprešión a chi cueres del röst tan dures y crudiei. Cie se 'mpëns-i de fè? D' i tò 'l mušát cun sama y dut, sà-η bën, ma cun bõla maniera y zënza i fè tēma o 'l sprigulè. Anzi un d' èi, che fòva 'n drë minción y bon de cuienè la gënt, se-l' à riëš 'mpessèd' òra, cò ch' i pudëš' la fè franca y 'mpò mè-drë fè 'n pitl gspas. Cò fëse-l? 'L i va dò bøl mugöl al bon vödl, che fòva d'intánt passà via zënza i usservè, y i autri doi i vën bøl plan dò ad èl. Pernanche 'l pöia 'l mušát, slonge-l bøl mugöl y bøl a chiet la man sëura 'l mušát via, y desciola te 'n mumënt la ciavazina, ma cun na franchëza y na svaltëza única. 'L mušát rōsta destacà zerúc, y 'mpò d' èl se taca ite 'l lère. Riëš se tire-l gù la capuza, ficia 'l cë tela ciavazina, se-la tēn drët bën

'ntëur 'l oòl, y va dò al bon vödl y pröva cun si zòchi de fè dò i vares de 'n mušát; y 'l puere vödl giva mè-drè for bōl dan òra, zënza cialè mèi zerúc. 'Nsi fòv-i gīč dui doi 'n bon tò' de strèda. Ma can che 'l lère òva pedù calculè, ch' i autri doi se-l' èss' mu- chèda cul mušát, s' à-l mè-drè fermà ta mōza strèda, s' che na bōstia che fēs 'l restier. 'L vödl, zënza cialè zerúc, pröva de 'l fè unì dò, i dà 'm pitl struf tel zigl, y diš bōl mugōl: «Arri.»— Ma 'l mušát ne se muef plu no fruz no frōgul. Y nia ne gōva: no i dè la bōnes, no i dè la rīs, no trè cun duta fōrza tela cia- vazina. Finalmēter s' èute-l 'l bon vödl, y vëiga, che 'l mušát ie diventà 'n capuziner. Dala gran marueia n' èsse-l adōs no plu cherdù a si uedli. «Pu chi sēis-a?» 'l damande-l, «y ulà ie-pa mi mušát?» Y 'l lère i respuent drèt da omel y da smieler: «Mi bon uem! Je son vōš mušát; perdunē-me: 'l ie mōfun mesèries del mont. Èis la bontà de me scutè sù, pō ve cont-i, cò che la me ie suzeduda. Mi bon uem! Je son, s' che udēis, 'n capuziner; vivōve retirà dal mont te na pitla zèla de 'n cunvēnt cun fè peni- tēnza y uraziōn. Ma 'n dí òv-i urtà a rumpì na scudōla, rugēnta y nueva, y 'l guardián m' à dat na drèta remenèda y per castic è-i messù diventè per cin ani 'n mušát y viver tan giut sot-al bachèt. Pensède vo, tan d' jēdeš che mi puere spinèl à messù purtè de bieì gran pēis y tenì òra striches; 'l rōst pudēis ve 'mpensè zënza ch' èbe drè' de ve-l cuntè. Ah, še chēstes n' ie cōsses da bradlè y da menè picià, de cie dēss-u-γ-pa pō bradlè y se fè cumpašión? Ma finalmēter ie passà 'l tēmp, che dòva durè mi castic; šì, pròpi 'ncuei ie-l òra 'l tēmp, y s' che udēis, sonže zēn inò chēl da prima. Gēn ue-i me desmencē y perdunè, mi bon amíc, dut cant chēl ch' è sufri y pati; perdunē-me 'nce vo a mí.»

Še bēn che nōš bon vödl cherdōva dut y se gudōva de vèlè de na cōssa tan straudinària, òve-l 'mpō 'nce na cërta mueia de messèi unì mè nsi te n' jēde dal uele y dal mušát. «Bēn, bēn,» diše-l, «cun vo y de vo sibe pu-mè chēl che Idie uel; ma ulà ie-pa revèda la sama de uele?» 'L uele,« respuent 'l lère, «ie unì purtà y cunsegnà per miracul tela mans del mèune del cunvēnt, y zēn pudrà-l 'mpiè sù al mancùl n' añ 'ntier na bōla gran lun tela lampa, che vèrt dan 'l autère de sant Antōne, y a vo v' unierà-l perdunà per ugne gota che vèrt 'n picià. Y zēn, mi bon caro vödl, ie-l èura, che vède inò zerúc tel cunvēnt. Adio, stašède bēn, a s' udēi.»

Pudēis ve 'mpensè, cò che ch' l bon vödl ie restà iló, 'ncantà, danter bēn y mèl, cuntēnt y mpō fōter descunsulà. Ma zënza pensè 'm pōz via y ca, cie che sibe o ne sibe, dà-l riēs èuta, y va a cesa. Per 'm pōz de tēmp ne fašōve-l nì auter che pensè dò a chēl ch' i fōva suzedù, y cunšidrè ce vita santa ch' i mēina ti cunvēnč, a vōster ch' i vēn tan castighèi per ugne pitl fal, y ch' i muessa fè tan de penetēnza.

Chindeś dí dò fòve-l marciá de bestiám. Ce fēs i lèrēs? Bōl da galantòm, mēin-i 'l muśát ch' i òva rubà, a vēnder. Y l' à pròpi ulù vōster, che nōs bon vōdl vède ēnche a marciá. Per-nanche 'l ruva sula fiera, y che 'l à cialà 'm pue' 'ncantēur, i pèr d' udēi ala semōia, ne sè še dēss' dì si muśát o ch' 'l puere capuziner. Pò va-l 'm pue' plu da-uḡin, 'l cunśidra mò da una pèrt, mò dal' autra, y diś tra sè 'nstēs bōl a chiet: »Die me - l perdone! Ch' l puere capuziner à inò urtà a fruzè vèl scudōla, y 'l padre guardián i à de segur inò dat zēnza remeśiòn la sòlita penetēnza.« Depò i va-l da-uḡin y i diś sucrèt da na urēdla ite: »Sēis-a vo?« Y 'l muśát pēta 'n tēl fōter brēdl, che 'l bon vōdl se pēnsa y giudiciōia che 'l damande purdenanza. Dala cumpa-śiòn che 'l i fēs, se resśolve-l zēnz' auter de 'l cumprè a ugne priēs, y de se-l menè a cēsa, y de 'l tratè for drēt bēn, 'nchin ch' ēssa da durè 'l castíc y ch' l puere cōso recevēs' inò 'l perdón. Bōl riēs va-l da-uḡin a chēl che 'l à da vēnder, y zēnza marciadè 'm pōz, i piet-l y i dà dut chēl che 'l damanda, se-l tōl y se - l mēina bōl plan a cēsa; y pudeis bēn ve 'maginè, še 'l s' arà 'nfidà a sentè sú.

Can che 'l ie revà a cēsa, s' à-l 'ngignà na bōla stala; dant al dut i à-l fa dè ḡú la rocia, pò l' à-l sblancheḡèd' òra, y pò mò depēnt' òra. Y zēn ne la cunśidròve-l plu ś'che na stala, ma ś'che na zēla. Y davia de chēl ne laśòve-l degún auter bestiám la-ite. Veslè 'l veslòve-l for ēl 'nstēs cul miēur fēn, de bōl diguei y cun de bōna blava. Cun 'n tēl guiērn se sà che 'l muśát mes-sòva se 'ngraśè, y giatè 'l pēil fin y lucēt. Y pò ḡiva 'l bon vōdl mò ugne tant a 'l stridlè, 'l lavè y 'l puzenè drēt bōl.

Se sà, che n' ie ḡi via giut, che la ḡēnt à scumencià a mu-ferlè y a 'l dì òra francamēnter, che ch' l uem muessa vōster unì de cervöl o al mancül fantinè òra de misura a vōster che' l fēs 'n tēl fè cun ch' l muśát; ma ēl cuntinuòva a dì mò plu franc, ch' i udrà bēn te 'n valḡún ani, cie che sarà da nuef de ch' l muśát, y a zèrta persones i cunfidòve-l gor duta la stòria. 'N fòva danz 'nce de chēi ch' ēssa tòś cherdù, che ch' la fōtra bōstia sibe vèl d'ètra. Te cin ani dunque dòve-l suzòder zòche d'ètra limpèa.

'Nfati, can che 'l fòva da-uḡin dai cin ani, ḡiva nōs bon vōdl mò plu suēnz te ch' la bōla stala a cialè dò, še 'l ie vèl da' nuef; y cun ēl univa 'nce vèl autra persona de cunfidēnza. a i fè cum-pania, y staśòva ēures ala longia ilò ad aspità che suzòde ch' la mudaziòn, che ch' l puere muśát devēnte inò capuziner. Passa i cin ani y nia ne devēnta. Zēn ne savòve-l cò se 'ndì 'l bon vōdl, y scumēncia a pensè dò cò che la pudēssa vōster; y 'ngali i ie-la tumèda ite. »Á un che toma zerúc tel medōmo fal, i dà-ḡ 'l se-gondo jēde 'n maḡer castíc, na penetēnza che dura plu giut.« — Davia de chēl à-l cuntinuà a 'l tratè 'nce dò i cin ani for drēt

bën, anzi 'nfina che 'l ie mòrt, 'η pò dì, dal blo' gras che 'l fòva diventà.

Can che 'l fòva mòrt, òva 'l vödl 'n vöre ferdrús y s' à 'mpessà, che 'l guardián 'l òva-pa möfun plu segúr castigà y cundanà a diventè y restè muśát tēmp de si vita.

Sta stòria ie metud' òra a pòsta per mustrè, cò che de rie gēnt per pura malizià y cun blo' baugies pròva, no mè de 'ngianè la bona gēnt, ma 'nfina-mèi de mèter 'n ridicul la virtù crestianes y la santa religiòn. Schivē-ve y temē-ve da chēi che reřona gēn di pròves, di capuzíneri, dela múnighes i di cunvēñ.




## Na viva pra mēisa da nòza dela mēssa nevöla de Segnēur P. Capuziner Piere Damián Verginer da Bula.

(Fata da Segnēur Batista.)


- I. Na ciantia metēss-i gēn òra  
A unēur del Segnēur Premeziánt;  
Ne sè pò, še vēgne da-in-òra,  
Zēn fēs-i na pròva d' intánt.
- II. Per vo, Segnēur Pater Verginer,  
Per vo vèl sta pue' de cianzón,  
Zēn che sēis diventà capuziner,  
Vo, nòš pitl mut da Anción.
- III. Ve diēse mè-drē doi paròles,  
Ma drēt ala bōna y bōl brèt;  
Savēis pu ch'è fa pitla scòles,  
Y chēles mò massa da frèt.
- IV. Audíde zēn cie che ve diēse,  
Y cie che è 'ncuei usservà;  
Mè-drē che vòš cuer se-la riēse,  
Pò sons 'nce ie cuntentà.
- V. Ciauzèi n' ēis-a drē' ala mòda,  
Pò gēis mò deschēuz 'ncantēur;  
Che še ruvessais te vèl bròda?  
Pò fosse-l 'n fōter bur lēur.

- VI. Dela bèrba ne diš-i mè nía,  
Che bèrbes à-i bèn 'ce tlo'ntèur;  
Ugnún uel valèi cula sia,  
Y mašima i gèuni can che la flèur.
- VII. Y 'l guant, che èis vo, Segnèur Piere,  
Nen ie-pa 'n guan' da segnèur;  
Je cèle 'ntèur-òra y chiere,  
Y vèighe, che duč n-à 'n mièur.
- VIII. A vòster 'ncuei na tèl fòsta,  
Pudais bèn 'mpò 'n tò 'n mièur.  
Minais-a ch'uniss' la tampòsta?  
Pu pò fais pu sot-al celèur.
- IX. Y tlo sèis pu ènche a sosta,  
Y duč à pu 'l guan' da san-dí;  
Vòs bøl sè-i bèn je cie che 'l costa:  
Na pròša š'che chël da ugne dí.
- X. Del guant ne 'ndašèise vo nia,  
Mè 'n bøl padernòster y 'l brevier;  
'L röst dašèssaise dut via,  
Magari per 'n criegl de pier.
- XI. Doi còsses ie vòsta legrèza:  
'N gran padernòster y 'l brevier;  
Y chèsta ie vòsta richèza:  
Ma 'mpò sèis plu ric che 'n banchier.
- XII. Vo sèis zèn segúr dela salvèza,  
Y sèis vòramènter cuntènt;  
Gudèis ugne vòra belèza  
A vòster te 'n tèl bøl cunvènt.
- XIII. O bon Padre Piere, periède  
Per duč vòs amič y parèñč,  
Ch'i ruve 'n dí de-beriede  
A vòster beač y cuntèñč.
- XIV. Y vo, che sèis tlo a sta nòza,  
Gudè-v'la ugnún da crestián!  
Drusède zèn duč vòsta bòza:  
Na viva a Segnèur Piere Damián!



## La plaza y la dliesā de S. Piere a Roma.

La maġra plaza del mont sarà 'mpò chēla de San Piere a Roma. Chesta plaza, ch'ā na lunghēza de 340 mètri y na larghēza de 240 mètri, ie certlēda ite da una pèrt y dal'autra da cater linges de colones o sēves turondes; 'n dutes n-ie-l 284, dunque 142 per pèrt. Danter la colones o sēves passe-l trēi strēdes o pòrteš tan lèrč, che pudēssa passē doi caròzes a pèr. Sul tēt de chiš pòrteš ie-l 162 bōla gran statues de sanč. Dut cheš lēur, ch'ie unī fat dal aṅ 1655 fin al aṅ 1667, à custà passa cater miliōns curones.



La plaza y la dliesā de S. Piere a Roma.

A mōza plaza ie-l 'n gran obelisc, o cò che nēus dišōn, na bōla sēva spiza, 25 mètri auta; da una pèrt y dal' altra de chesta sēva ie-l a dī del tudēsc 'n gran Springbrunnen, che spriza sū l'ēga dí y nuet plu aut che na cēsa.

Da chesta plaza de mōz va-γ su per 21 šalires y ruva dan la cin rēses dela plu gran dliesā del mont, frabichēda a unēur del apòstul san Piere, che ie mòrt, cò che la stōria conta, sula crēuš, l'aṅ 67 dō Gešú Cristo. Supli fòve-l unī a-prēš-a puec pròpi ulà che ie zēn si dliesā. Sula fōssa de san Piere à pò frabicà 'l tērzo papa, ch'òva inuem Cletus y ch'ā regnà dal 79 fin al 91, na pitla capōla, ulà che i prim crestiāns s'abinòva a fē si uraziōns y devuziōns. Tel medōmo luec, ulà che fòva chesta capōla, à 'l còser Constantin y si fiōns dal aṅ 320 fin al 350 lašà fē na gran

dlieša, che muessa vöster stata, cò che diš la vödla scritures, böla termënt. Ma chesta dlieša ie ġita 'n malora cul tēmp, y 'nši à scumencià 'l papa Nicolao V. l'añ 1452 a frabichè na dlieša nueva. La frábica à durà adòs doi cēnt ani, percie che la dlieša de san Piere dal dí da 'ncuei ie permò unida cunsagrèda dal papa Urbano VIII. ai 18 de novēber 1626.

La dlieša de san Piere n'ie pròpi la plu böla, ma bēn la plu granda del mont. La ie 187 mètri longia; la larghēza n'ie dlone unfat, percie che da una pèrt y dal'autra ie-l capòles, che per sè 'nstēsses ie böle de bēn-de-bò gran dliešes. Pò muess-uḡ ēnche savēi, che la dlieša ie fata 'n forma de na crēuš, a-prēš-a puec š'che la dlieša da Urtišeì dal dí da 'ncuei. 'L tòc de dlieša, che fēš ch'sta crēuš, ie 137 mètri lèrc.

Autèrēš ie-l te dlieša de san Piere trēnta. 'L gran autère ie böláu ta mōza dlieša sot-a 'n gran baldachin de bront. Sun chēs autère pò mè dì 'l papa mēssa, y per chēl se tlame-l ēnche »autère papale«. Sot autère ite ie-l 'l sepolcro o la »confessio«<sup>\*)</sup> de san Piere, che 'ḡ pò ġi ġu per doi böla šèles de miērmul a udēi da-uḡin. Ma 'nce a stē dan la ciancelèda turonda, ch'ie dan 'l gran autère, vēiḡ-uḡ 'l sepolcro de san Piere. Sun chesta ciancelèda ie-l 89 gran lampes 'ndurèdes, che vèrt dí y nuet a unēur de san Piere. Sēura 'l autère ie-l 'n böl gran plafón turónt o cúpola plēina de viereš, che vēn purtèda da cater gran pilastri. 'N sarà bēn puec che vēn a Roma zēnza ġi sula cúpola a cialè ġú.

Dò 'l gran autère, ma bon tan da lonč che la dlieša da Urtišeì ie longia, ie-l mò n'auter böl autère, che se tlama la »cátedra« de san Piere, percie che sun chēs autère ie-l la cátedra oder 'l stuel, ulá che san Piere stašòva a 'nsegnē la dutrina crestiana. Cheš stuel, che fòva de lēn y che, al dí da 'ncuei, ie ciarià ite de bront, ie sēura 'l tabernacul y vēn tenì da cater gran statues, che raprēnta i dutores dela dlieša: Ambrosio, Agostino, Atanasio y Giovanni Crisostomo.

Zēn fosse-l mò da cuntè sú duta l'autra marueies y belēzes, ch'ie da udēi te dlieša de san Piere. Ma l'ie pròpi böláu 'mpu-šib! a ulēi dì dut y ne fossa-pa nianča lèrc no te cheš pitl calēnder. Basta savēi, che te dlieša ie-l passa doi cēnt monumēnč y statues de miērmul o bront, una plu böla del'autra, dut cunst mōfun. La plu böles y plu grandes ie: chēla de santa Verònica, santa Elèna, sant Andrèa Apòstul, y san Longino, che ie metudes una per pilaster che pòrta la gran cúpola. N'autra statua meríta ēnche de vöster numinèda, la statua de bront de san Piere, che sta sentà sul tròno da vēscol. Bēn ugni crestián, che va a san Pierè, bossa 'l pò drèt de ch'sta statua, y a fòrza de bussè ie cheš pò šaldi menà ġú. Finalmēnter sibe mò usservà, che te dlieša

<sup>\*)</sup> »Confessio« se tlama 'l sepolcro, davia che ugni mártire cunfessòa mo 'nce te fossa 'n zèrta maniera si fòde crestiana, per chēla che 'l ie uni marteršà.



de san Piere ie-l 35 còrps sanč y na quantità straudinària d'otra reliquies.

Chi che vèn dunque a Roma y va a san Piere, ne 'l fèse mè per curiosità, ma per devuziòn, percie che 'l luec ie vòramenter sant, luec ulà che ch'l bōl Die per interzessiòn de san Piere à cunzedù y cunzōt mò truepìsima grazies a chi ch' à la bōna vulentà de viver y muri da bon crestiàn.

Segnèur Antòne da Fussèl.

## L' amor del' oma.

(Da Fr. Moroder de Lenert a Urtisèi, dò na ciàntia inglèisa.)

- I. Cie ie-l che sun cheś mont lieia 'l cuer  
 'L plu santamēter, del ric y del puer',  
 Che bōle al naşer cun gaudio nes saluda,  
 Che dura fin che la mōrt nes spartēs y dut muda?  
 'L miēur sun cheś mont, che dal ciel nes pō unì dat,  
 La maġra bendeşión ch' Idie nes à fat,  
 'L plu amabil, 'l plu vēira, 'l plu che dura:  
 'L ie l'amór del'oma y si cura.
- II. Tan de mèi bōl dan nōş naşer, y pō ce bria  
 Pra la cuna, dí y nuet ne laşe-la dò nia,  
 Ce lēur a nes cuntentē, ce tēma, ce cura,  
 Dut supòrt-la cun pazienza zēnza misura.  
 La riş cun nēus, y a cuer i va duč nōş mèi,  
 Y ce festide, ce duel, can che son amalēi.  
 Mèi n' à-la fat assē y pra nēus sta-la for,  
 Mèi ne se stancia del'oma 'l gran amór.
- III. Y pō che son plu granč y cherşui sù,  
 Che 'l mont minacia nōsta giuventù,  
 Şi che la se prōva cun bon 'nsegnamēnč,  
 Che restonze da lonč dal mèl y bieì valēnč.  
 Tel pericul nōsta miēur custòdia sarà  
 Ch'la paròles d'amuniziòn y d'aurità,  
 Che dut a bōnes y tan de cuer reşona  
 Plēn de tēma l'amór de na bōn' oma.
- IV. Y can che cui ani 'ncie per nēus vèn 'l tēmp,  
 Che se 'ngignón cumpania y tēl pitla gēnt,  
 Che tan nes sta a cuer, y ch' i ulón tan bon,  
 Mè per nōsta familia nēus se festidiòn,  
 Ugnún a sè pēnsa y per i siei cialerà,  
 Del fra, dela sòr, del amíc l'amór passerà;  
 Ma še duč t'ēss' desmincià y t'ēss' tralaşà:  
 No mèi, mèi l'amór del' oma ne sarà finà.

# I lèrēs ch'òva mazà la gënt de Rustlèa.

## I. I lèrēs romp ite te cēsa de Rustlèa.

'L fòva del 1836. La cēsa de Rustlèa fòva 'nlèuta frabichèda siche la ie mò al dí da 'ncuei: l'òva doi partimēnč, ma ded-ite ne fòve-l deguna šèla da gī su-aut. Bas-ite stašòva bèra Žanōto Delago cun si fēna Mariana y 'n mut Leviš; i òva doi fanciòles, una Maria Messner y l'autra na Badiōta che se scrišòva Rudi-fèria. Chest' ultima ie mò stata giut te Gherdèina dò-prò: Sēura-ite stašòva 'n calighè, Jacun Rubatscher, 'ŋ i dišòva Jacun Toc, cun si fēna i mò doi ēiles a fuec.

Bèra Žanōto òva butēiga. De sēires, can che i òva servì la gënt ch'univa a cumprè ite, žaròv-i la pòrta a-benēura y ne giauríva plu auter ch'a de tēi ch'i cunešòva bēn.

'L fòva ai trēnta de setēمبر. 'Nfin la sòt da sēira òv-i vendù ròba; can che l'ultimo, che fòva unì te butēiga, bèra Casper Ploner, s'en fòva gīt, òv-i žarà la pòrta. Tòne Tolpeit, che fòva ēnche sta sun Rustlèa a cumprè zòche, òva udù, can che 'l s'en fòva gīt a cēsa, 'n furōsto cun 'n stlòp sul còl uniàn sēura Rustlèa gú de viēres de Rustlèa. Ma 'l ne s'òva pessà nia auter.

Bon, ntant s'òva bèra Žanōto tēut ca la pipa y gīva iust òra 'n cēsa-da-fuec a se-la 'mpiē, che zachèi smaza pra pòrta y prōia per tudēsc ch'i 'l laše ite. L'òva iust ulù vōster, che bèra Žanōto gēure 'n ch'la sēira zēnza cunēšer chēl ded-òra. Te chēl mumēnt i dà bōle l'auter na scurtlèda cun 'n stilòt. Bèra Žanōto s'en mucia te stua i svēja: »Gënt, 'nsnuet sons duč andáč.« Y l'auter dò ad ēl. Bèra Žanōto mucia te standēgun, ma 'l ne la fēs plu a stlu 'l uš; l'auter à pedù mēter ite 'n brač y ti dà del stilòt ulá che 'l 'l toca, nfin che 'l toma 'ntēur. 'L òva, bèra Žanōto, passa 27 frides diš-uŋ, can che 'ŋ 'l à giatà.

'Ntant òva n'auter Talián metù man de laurè òra 'm pòrte y te cēsa-da-fuec: 'l mut Leviš y na fanciōla fòva unii mazèi iló. Anda Mariana y la fanciōla badiōta s'en fòva mucèdes te standēgun. Can che 'l lère, ch'òva mazà bèra Žanōto, les vēiga giate-l anda Mariana y la zèra òra 'n stua. La fanciōla se teniva prad ēila, y ie unida trata òra pèa. »Bezzi o la vita« svėje-l. — Anda Mariana i 'mpermēt d'i dè dut ce che l'à, ma 'l ne la laša 'mpò no stè; adúm cul auter lère, che fòva unì ite de pòrte, la tire-l òra te pòrte y scumēncia a la scurtlè, ēila y la fanciōla, che fòva mò for tachèda te si brač.

Te chēs mumēnt ruva bèra Jacun Toc sun pòrta. Su-aut dišòv-i la curona; pò, can ch'i òva audì ch'sta fuera, s'òve-l pessà de fri gú, še bēn che si fēna n'ulòva. Can che'l gēura la pòrta, se destuda la lum che 'l lère òva purtà òra de stua. Žen fòv-i

a scur, y la fanciöla che fòva pro anda Mariana, s'en mucia bōl a chiet — i diś chē l'òva i stentíns ded-òra gū —, y sauta sa Lēc a cherdē gēnt. Sa Lēc stašòva bèra Ušöp Ploner; 'l manda debòta si fi Stöfun a cherdē d'autri, y ēl 'nstēs sauta cun si auter fi Giuvani via Rustlèa.

I lèrēš, che fòva a scur, n'udòva 'nstēs no plu, cie ch'i fašòva; che zachèi fòva unì da pòrta ite, s'en òv-i bēn 'ntendù: chēl che fòva de guárdia ded-òra da pòrta, òva metù vèrda massa puec. Zēn tel scur mēt-i man de se scurtlè y de se dē 'ntra ēi. Bèra Jacun Toc s'òva 'ntendù massa tèrt de cie che se tratòva; 'l nen òva nia tela man y cēla bēn de s'en mucē debòta. Ma 'n lère ti fier dō, 'l pōia y 'l copa. Bèra Jacun chērda 'n aūt, y si fēna vēn d'aut gū. Ma la ne ruva nia gū leprō, che 'n lère ti vēn bōle a 'ncontra per la mazè: ēila mucia, ēl dō. Sun šēla la pōie-l per 'l chitl. Riēs pessēda, i laše-la 'l chitl tela man y s'en mucia. Ma la ne l'essa 'mpō no fata, še ne fossa unì te chēla Ušöp Ploner (da Lec) de-sēura gū; sun ch'l cōl sēura Rustlèa mēt-l man de fē na drēta fuera. Udēi n'udòv-uŋ nia plu, y 'l lère ne savòva, tanč che 'n fòva tla-sú. Sa dliēša sunòv-i bōle ciampana a martōl. Can ch'i lèrēš a udù ch'i ie 'mpandui, se-l'à-i data piērsa; 'l lère ch'òva pià la fēna de Jacun Toc, n'i ie plu gīt dō; 'l tōl ca 'l stlōp y tira 'n colp su per ch'l col; bèra Ušöp à audì la codla šiblān dlongia via. 'Ntant sauta l'ēila su aut da pòrta ite y zēra la pòrta: a chēla mòda ie mò unides salvèdes la trēi ēiles che fòva su-aut.

Chēi che Stöfun Ploner òva abinà per gī sun Rustlèa, à bōle udù da lonč i lèrēš mucian via per puen' dala Gërva y la-via òra. 'N i fòva bēn sautēi dō, ma tel scur ne fòve-l sta mōžun de 'nfē nía. I lèrēš ie gīč 'n chēla nuet y l'auter dí 'nfin ch'i ie stai boni; i muciova for de vières de mon'de Sēuč. Un s'òva perdù la cazīna, che'ŋ à pō giatà sun strēda. Te 'n medèl òra 'n mon' de Sēuč à-ŋ giatà 'n stlōp, na pistòla y 'n gran stilōt: iló fòv-i roč ite y s'òva fa da majē. 'Nce te n'auter medèl à-ŋ giatà 'n stlōp: un' sòva despartì dai autri y fòva gīt sēul de vières de cēsa.

## II. I lèrēš vēn piēi sú.

L'auter dí à-ŋ bōle mandà da Ciaslōl de mōž gēnt a i cri, y fat a 'l savēi ai autri giudizi. 'N pō se pessē che 'l nen ie sauri cri sú valguni òra 'n mon' de Sēuč, y 'l nen ie nia da se fē marueia, še 'ŋ n'i à plu piēi.

Ma a Faša fòva revà 'n valgún dis dō un pra sugnería a cuntē che, a unì da Gries a Perra, à-l urtà 'n cōšo ch'i savòva drēt da temēi y che cialova prōpi òra šiche 'n lère: 'l fòva mèl ciafià, semiòva d'avēi na trica de vèl sòrt, y òva na man liēda sú; 'l di-

sòva, che 'l s'òva fa mèl a tumè 'nzaul. 'L fòva per gī a Pardác a tò zòche sanč che 'l òva mò da vènder, dišòve-l.

Sugneria à debòta mandà doi uemes de vières de Pardác a 'l cri, y bōl 'mpont 'l à-i pià ilò. 'L ie unì menà te persón, y pò damandà òra; ma 'l n'en dišòva una na drèta; tòš dišòve-l inši, tòš inò autramènter; cò che 'l s'òva fa mèl ala man ne savòve-l ènche no da di. Che chēs fòva un di lèrēš, chēla fòva bēn tan che segurà. Ma 'l ne fòva mōžun de 'l fē di òra vèlc di autri. Te plu de 'n mēns che 'η 'l òva tenì te persón, òve-l mè di chēl: che 'l òva inuem Luigi Botticelli y che 'l fòva fèver a Grigno. Ma can che 'η savòva n' jēde chēl, pò fòve-l bōle speranza de piē 'nce i autri.

'N à damandà dò a Grigno y à audì, che 'l fòva sta de setēber, dunque 'l mēns dan che vègne mazà chēi de Rustlèa, 'n valgún jēdeš a Castel Tesino. Y pò iež-uη inò unìc a 'l savēi, che trēi tēi rie maladēč, che duč schivòva fòter a Castel Tesino, òva mancià 'nlēuta dal fat 'n valgún dis. Doi frēdeš: Tommaso y Bovo Moranduzzo y n'auter, Angelo Balduzzo fòva stai òra 'ntēur 'n diēš dis y fòva pò unii inò a cēsa dut arfamēi, 'l guant zarà, da fēn y da ledám; y dò 'nlēuta rušnòv-i puec y schivòva òra la gēnt. Si fenáns s'òva ènche 'ntendù che messòva vòster travenì zòche de no drēt.

Bon, chiš trēi à-i ènche pià sú, y prēs dò à 'l plu gēun d'ēi cunfessà ite dut.

### III. Bovo Moranduzzo conta, cò ch'i se-l' òva fat' òra. La cundana.

Tommaso Moranduzzo, si fra, ie sta chēl che se-l' à pessed'òra y ch'à rušnà sú i autri. 'L fòva cramer, maridà, y òva 'nlēuta 36 ani; a Castel Tesino òve-l 'n tēl pitl luec, plēn de debíč. Na sēira urte-l Luigi Botticelli a Grigno, 'n drē'loter, che fòva bōle sta te persón doi jēdeš; 'l òva 34 ani, fòva ènche maridà, y fòva per drēt fèver; burt, fosc, dala bërba foša ch'i curiva ite adōs i uedli, cialòve-l bēn òra prōpi šiche 'n lère o 'n sassín de strèda. A chēs i conta Moranduzzo, che 'l ie stat te Gherdēina cula crama; te na cēsa, ch'ie 'm pue' da lonč dal'autres, à-l spià òra dut: 'L patrón à na butēiga y šaldi grōš; ēl, 'l cramer, sà franc ulà che 'l i ascuent. 'L patrón ie 'n bon còšo, che se tēm prēs, fanč nen à-l deguni, 'l à mè 'n mut y chēl nen ie nia drē 'nton. Še 'η fossa 'n trēi 'm pue' da curagio, pudēss-uη abinē 'n bōl grum de šòldi zēnza gran fē: Un messēssa i fri permōz al patrón 'm pue' cula rīes, pò dašesse-l-pa ca i šòldi zēnz' auter, dala gran pēura che 'l ēssa; y i autri messēssa cialē che ne vègne nia fa fuera o cherdà gēnt.

I conta nce, che bèra Žanōto òva dessenà cheš cramer cun na matada y che l'auter i òva pià 'l sēn. Cheš Talián vendòva

sanč. Bèra Žanōto i òva cumprà gŭ l'añ dant 'n sant Antòne, y, per fè na cuienada, diše-l al Talián, che'l dèssa i 'n menè na biena. L'auter vèn l'añ dò cun chiš sanč; sà-ŋ bèn, che bèra Žanōto n' i òva cumprei. De chēs dèssa 'l Talián s'avèi dessenà.

Bon, cheš fèver Botticelli se pènsa 'm pöz; 'ngali diše-l che 'l sta ala pèrt, a cundiziòn ch'i gròs vègne partii rèidla; ma che 'ŋ muessa cialè de giatè mò doi uemes, per vòster plu segures; še cheš buteghier ie tan ric, giata bèn 'mpò ugnún nia mèl gròs. Chi fosse-l-pa mò da giatè?

Moranduzzo ch'òva 'mparà a cunēšer šaldi gēnt a gī cula crama, diš, che Angelo Balduzzo fossa'l drēt; 'l à danz permò 24 ani, ma 'l n-à bōle fat 'n valgunes, y ie sta žarà via plu jēdeš. 'L quarto fossa Gambatista Pelloro. Chiš doi fosse-l mò da giatè. 'L va ala Plief de Tesino a i cri, i mēina t'ustaria y i paja da böver 'nfin ch'i fēš pat cun cheš malán. Ma Pelloro n' i òva nia drē' crēta ala stōria, y 'n valgún dis dò i à-l fat a 'l savèi, che 'l ne tēn pèa, ma ch'i dèssa stē zēnza festide, che 'l ne dirà a deguni nia.

Žēn fòve-l inò da 'n cri n'auter. Botticelli diš a Moranduzzo, che 'l dèssa cialè che si fra Bovo Moranduzzo stēbe ala pèrt. — Chēs òva 'mpermò 24 ani; ma 'l fòva ēnche bōle sta 'n valgún jēdeš a i cialè ala mašóns scures. Si fra Tumēš à sapù da i-la ciaculè sú tan giut, che 'l à 'mpermetù de gī cun ēi.

Doi sēires s' à-i mò abinà dui cater a se rušnè òra dut cò che toca. Ueia y curagio òva mè i doi plu vōdli, 'l fèver y 'l cramer; ai autri doi i mujòva per drēt ch'i òva 'mpermetù. Ai 28 de setēber, 'n miērculdi, òv-i fat òra de piē via. Sà-ŋ bèn ch'i s'òva tēut èrmes cun ēi, pò cērn y pan, ch'i gīva te vèl medèl a se cuginè, y ēga-de-vita, per giatè plu curagio. Gī gīv-i per 'l plu de nuet, y de dí paussòv-i. Ai 30 dala trēi dò-mež-dí fòv-i mucē sun mon' de Faša a piē gŭ.

Can ch'i fòva revèi gŭ, fòve-l bōle scur. 'L cramer y 'l fèver va pò dan òra a fè la spia; i vèn prēs inò a dì che dut va bèn y ch'i pò la 'mplantè. Y dui cater pōia gŭ de viēres de Rustlèa. Bovo Moranduzzo, che se tēm, mēt-i ded-òra a fè la spia. 'L cramer, ch'à 'mparà tudēsc a gī cula crama, smaza a pòrta y prōia per tudēsc ch'i 'l laše ite. Can che bèra Žanōto gēura, fier-i ēi trēi da pòrta ite.

Dò 'l fat fòv-i mucēi duč de-berieda 'm pöz. Pò òva Bovo messù restè inò, che 'l òva mèl a 'm pō. Èl fòva gī per Trēt y Valsugana a cēsa. I autri trēi òva mò durmì adúm 'n chēla sēira, te chel medèl ulà che 'ŋ òva giatà l'èrmes. L'auter di s'òv- i ēnche despartì per ne dè nia suspòt. Y i l'òva-pa mò pajēda dassēn: i ne se 'nfidòva no a priē d'albiērc no de vèl da majē; pò òve-l mò metù man de gētè 'n doi o trēi dis fort. Doi fòva revèi a cēsa dut mòì y arfamèi; Botticelli òv-uŋ bōle pià a Pardáč.

De cundana òv-i giatà 20 ani per-un, auter che Bovo; chël òva giatà 15 ani, pervia che 'l nen òva fa nia a gënt y òva cunfessà ite dut.  
A. L.



## Per la fösta del 1908 a Urtisèi.

- I. Ve saludón cun duta stima,  
Mont de Frèa y Gherdenacia,  
Vo de Sëlva y sant' Crestina,  
Dut Surèghes cun Puciacia,  
Vo Badiòc y Ampezáns,  
Mò Fedomes y Fašáns,  
Bën unič duč a un,  
Per la fösta del chemún.
- II. Vo Ladíns sèis duč 'nvièi  
Per sta fösta a gūdè;  
Pitl y grant, tan èiles ch'ei,  
Da nòš chemún a saludè  
Y ringraziè del gran unèur,  
Cura y bria, che s'à dat  
Nòš Grof amà y bon Segnèur,  
Che sèulamènter chēs à fat.
- III. La natura dut plu bōla:  
Dut se-la gēut, bën grant y pitl;  
Tan plu tlèr ie mont de Sōla;  
'Nce l'ava à n'auter chitl.  
Dut se-la riš dala legrèza,  
Sauta y ciga; china i pēs  
Te ruf cun gran svaltèza  
Spriza 'ntèur y se devertēs.
- IV. N'ulēs<sup>s</sup> dì nia dela mutáns,  
Di mutóns, 'nce del'oma,  
Dut deslià, 'nchina i cians  
Sauta 'ntèur s'che mač y toma.  
'L plu da rì ie mò Sas-plaç,  
Sas-lonc ne sta plu nia chiet;  
Chi crèps sta ca s'che cater mač:  
Pudēs<sup>s</sup> minè che 'l ie 'n sueñ te liet.
- V. Dut sauta adúm a decurè  
Cēses, plazes, a fè purtóns  
Cun nēif, stanges, y a purtè  
Daša, 'nce tèi pitli mutóns.

I vödli ambòlč: Chël da Snetón,  
Da Còsta, Murèda y 'l Cadèmia,  
'L Pöc, 'l Purger, chël da Janón,  
Fač de nēif meríta prèmia.

VI. 'L ie dò-mež-dí, zēn prēs la doi,  
'L Grof muess' ruè bēn ugne mumēt;  
Ġēnt ie-l bōl dlonc sun ugne troi,  
La muš'ga sauta che'l ie 'n spavēt.  
'L ambòlt saluda 'l prim de duč,  
Pò chēi de scòla: Segnēur Pluán,  
Šizri, dutores, y Segnēur Puč:  
A dui ti dà Segnēur Grof la man.

VII. Cun gherlanda spiza sie<sup>s</sup> mutáns,  
Fòve-l a reciöver nòš Segnēur,  
Ne se diš tan bōles, semiòda fiáns  
De 'n còser, no d'usèdes al lēur.  
Ch'la Milia à dit tan bōl y a drēt  
Chel rim che bèra Franzl à fat;  
Je m'è 'namurà, — Die benedēt  
Ġude-me, še no devēt-i mat.

VIII. Val de Gherdēina, mi legrēza,  
Data de fertuna trēs y trēs;  
Dut stupēš per ti belēza,  
Tēi bieì crēps y monč che t'ès.  
Rōsta š'che t'ies per for y for,  
'N pòpul 'mpulsà de spirt y vivanda,  
De cunfidēnza a Die y amór  
Al lēur; 'l ciel te darà la gherlanda.

Cristl Delago.



## La Madòna à da-gnēura ġudà.

(Da Segnēur Pluán Anderlan.)

La vödla dliesà da Urtišēi ne fòva zacán ulá che la ie al dí da 'ncuei; la fòva sa sant' Ana, ulá che ie zēn la curтина, y fòva 84 pieš longia cula curтина 'ntēur ite, cò che 'η vēiġa mò te truep lueš. Dlongia fòva la capòla de sant' Ana, cò che la sta mò al dí da 'ncuei; y che, a chēi tēmps se tlamòva la capòla dai òš. La dliesà iló fòva stata frabichèda l' añ 1744, ma i òva fat la murèdes massa dēibles, a maniera che les zessòva; 'l revēut tragòva de gran sfèsses cun gran pericul de tumè ite, y la dliesà scumen-ciòva a se sfēnder. Per chël à pò chēi da Urtišēi frabicà la gran

dlieša che ie zën. Y dò ch'i l' à abuda finèda, à-i trat gù la vödla dlieša y à fat dut curtina 'n maniera, che fòva mè-drè plu 'l ciampaníl sèul 'm pò, che semiòva al ciampaníl da Sta. Crestina. Gá che pò i ne savòva plu ce fè cun cheš gran ciampaníl uet — la ciampanes òv-i bôle purtà gù sul ciampaníl dela dlieša nueva, — à-i destinà de 'l trè ênce gù. Ma cò fè per 'l fè bon-marciá?

Prima de dut 'l à-i stizà cun na gran quantità de trames da pèrt de sèura, pò à-i scumencià a giavè sot òra 'l fundamènt da chëla pèrt, ulà ch'i òva metù i trames. Can ch'i òva pò finà, che 'l ciampaníl staòva adòs tel aier de-sèura-pèrt, à-i 'n dí dò-mež-dí dat fuec ai trames per 'l sturcè; 'n gran grum de gënt s'òva abinà sun som i ciamps da Stlesùc a cialè, cò che 'l toma. Y 'l ie tumà ite su per i ciamps da Stlesùc cun pitl lèur y zënza fè 'l mēnder dañ ala capòla de sant'Ana che fòva dlongia.

Chëš ie-l da lieger tela crònica, che vën tenida sù te calònia da Urtișei.



## 'L vödl Tiroler.

(Da Segnëur Pluán Anderlan.)

Vivòva a Urtișei dan 40 ani 'n tel uem, ch'i i dišòva 'l vödl Tiroler, percie che 'l fòva de gran statura cun na gròpa da gigánt y ghèrt š'che na lores, šiche i uemes da zacán, che 'ncuei cun dí ne s'en vëiġa plu. 'L òva bën abù 'n luec, ma 'l òva messù 'l vënder, y se davagnòva 'l viver cun ġi ad òures. Ne fòva pròpi chel gran sant, ma 'n galantóm de gran fòde y carater. Spezial-mēter n-òve-l una na bòna, che ie stata la gauša, che 'l à fat na bòna mòrt, cò che pudón sperè cun duta rešón, y che ue zën ve cuntè.

Ulà che 'η pòia ġa pò de plaza ġu per 'l puntón dal puent de Pana, ie-l mò 'ncuei murà ite te mur na pitla statua dela madòna da Waissenstòn, y la gënt i diš la »Madòna del Purger«, gá che 'l nēine de ch'sta familia l'òva fata fè y mēter sù. Cheš vödl Tiroler òva la usanza, ugne jēde che 'l passòva iló, de se fermè dant a ch'la madòna, de tò ġù 'l ciapöl y de fè na pitla uraziòn. Chëš òve-l fat per truep ani y ie sta pajà dala madòna a na maniera, che duč dišòva: »Ala madòna ne fëš-uŋ nia debant.« —

'L fòva doi dis dan Pasca de Mèi, che cheš vödl Tiroler, — 'l òva bôle passà i 87 ani, — zënza savëi percie, ie tumà a cësa via per tiëra zënza plu se 'nsavëi o pudëi rušnè. Chëi de cësa ie depò de-bòta corš a cherdè 'l dutór y segnëur caplán, y tramedòva tòš iló. 'N chël mumènt, che segnëur caplán ie ruà da-



uġin dala letieria de cheš puere vödl, à-l giauri i uedli y à scumencià a rušnè, che 'l à pedù se pistè, unì urdenà y reciöver 'l sant uele. Dut à durà 'ntèur n' èura y mōza. Pernanche 'l à abù ricevù duč i sacramēnč, s' à-l inò pendù via y ie mòrt doi èura dò.

Cheš fat vëira mostra, che 'η dē da-gnëura vōster devòč ala Madōna, magari 'nce mè-drē cun na pitla uraziòn ugni dí. 'η ne 'l fēš segúr no de-bant. La madōna paja dut.



## Hansl maladèt.

(Da Segnëur Pluán Anderlan.)

'L fōva n' jēde 'n tēl uem, che se tlamōva Hansl, y percie che tel cē ne fōva dut cuèt òra y che 'l fašōva 'n datrai 'm pue' na strambaría, i dišōva duč Hansl maladèt. Tra l'autres n-à-l fat n' jēde na drēta blōta, che se meríta d' unì cuntēda. Cheš Hansl s'ōva frabicà na pitla cēsa da 'n partimēnt sēura ite, percie, a se-l di mè 'ntra nēus, 'l òva 'm pue' 'l muet; chēi tēmps frabricòv-uη bon-marciá, y 'l ulōva se fē vèl de blōt. Per chēl ulòve-l fē dala pèrt de sot 'n pitl žolder da pudēi ġi òra y cialè 'ncantèur, cò che la nibles va y cò che 'l tēmp ie y mò per outra còsses, percie Hansl fōva da-gnëura stat 'm pue' curiēus y capriziēus. I doi trames fōva bōle metui ite, che Hansl maladèt ie unì d'auter pensier: de fē mè-drē na funōstra, percie d'inviern è-i pò for da parè la nēif y me sfrēide massa la mašón y pò n' è-i for del'aurōla de laurè cun nēif. Ma, se pensòve-l, cò muess-i-pa fē zēn? I trames ie bōle metui ite, y a tò 'l zumpradëur coste-l inò, y spendù è-i zēnza bōle assè. Ma da maladèt che 'l fōva, s'à-l pessà: Chēš pòss-i bēn fē je 'nstēs y me sparagne al mancùl doi da-sòč. Y cie fēse-l? 'L tòl ca na šèla, l'ērč su per 'l mur, va sù, se sēnta ġú sul tram, y scumencia a 'l siē via, ma ded-ite-pèrt, per-mōz al mur. Te n'jēde crēpa 'l tram, y Hansl cun tram y sia y dut toma ġú, se fēš mèl a 'n brač, se romp doi rēpes y fruza mò la sia. Ma Hansl, nia sperdù, lōva sú, se craza 'l cē y diš: Chēs nen ēss-i-pa minà; muesse-pa bēn ġi da dutór 'n dumēnja, y chēl costa mò.



## Sentēnzes.

A sunè adròv-uṽ strumēnč;  
 A ciantè muess-uṽ vōster cuntēnč;  
 A uḡinè muess-uṽ vōster bieī valēnč;  
 A 'mparè muess-uṽ vōster drēt diligēnč;  
 A n' aršumè muess-uṽ vōster for atēnč;  
 A studiē mand-uṽ per 'l sòlit studēnč;  
 A se dessenè devēnt-uṽ revēnč;  
 A se puznè devēnt-uṽ ruḡēnč;  
 A bōver devēnt-uṽ 'm pue' rušnēnč;  
 Še 'l ie puecia lērc, se fēs-uṽ strēnč;  
 Še vèlc dura massa giut, devēnt-uṽ busiēnč;  
 'N tira plu saurí, še valguni spēnč;  
 I ueves da Pasca 'nḡign-uṽ 'ntēnč;  
 La fōrbes adròva chēi che depēnč;  
 Chēi che se pèra, ie chēi che vēnč;  
 Ded-òra da Bulžán diš-uṽ a Rēnč;  
 'L ḡiēut y i rati ie šōrfes y rassēnč;  
 Ulá che 'l ie viēra, ie-l da-gnēura spavēnč;  
 De rōgula plura mè-drē i parēnč;  
 'N grum de pensieres, 'n grum de mumēnč;  
 A 'n fè passa mile, 'n uele-l dai cēnč.

Segnēur Batista.



## 'N puec per sòrt.

**Pitla defrēnzia.** 'N dí passòva 'n tēl zarlatán de 'n snòps-prueder dan 'l paláz de 'n gran segnēur via. 'L guant òve-l plu tōs blot da pientles che da zandli — pò vōster, davia che fòva n'el y no n'ēila. — òra de na fuja dela ḡòca dut tacunèda cucòva òra na bōza, še bēn chē 'l ne fòva-pa un de chi slabòcs che va cun bōzes 'ncantēur. Can che 'l ie revà sot-al purtón del paláz, i à-l dà sú na tēl cērta udlēda, pò s'à-l autà ḡu-vier y à dit tra sè 'nstēs: »I fēs 'n tēl fè de cheš gran ricón ca-sú, a mí me pèr che sibe pitla defrēnzia tra mè y ēl: ēl à-pa mōfun scumencià zēn 'l segundo milión, y je scumēnce 'l prim.« S. Batista.

**Un plu maladēt del auter.** Cristl y Franzl s'udiòva a mòrt da 'm pōz 'nca bōle. Ma ne va via giut, che dui doi vèn žarēi ite: Cristl òva rubà n'ēura, y Franzl na vacia. 'N dí s'ancont-i te persón, can che i ḡiva dui doi sul gòng a spaz. Š' i ne foss' stai te persón 'n chēl mumēt, ēssa ugnún purvà d'i dē na scurtlēda

al auter, ma te chëla zircustanzes à-i mè-drë messù se cuntentè de se dè bøl a chiët un al auter 'n pitl rebòc. »M«, diš Franzl a Cristl, »fòrši pösses me di c'ëura che 'l ie.« — Y Cristl ti respuent bøl riës mò plu da mujë: »Ši, chël pöss-i, 'l ie ëura de gī a mëuđer.«

S. Batista.

\* \* \*

Disëde ma bøl de-bòta: 'N ne cherdëss', che ch'l mēder dëss' mēter pēn, che 'η ne 'l dešedëss', 'nce še 'η 'l cherdëss'.

S. Batista.

\* \* \*

Te na ustaria fòve-l n' jēde na mēisa plēina de gēnt, danter ite trēi mōleri, un mađer bravatōn del auter. 'L prim diš: »Je è depēnt 'n tò' de brōia che la semiōva tan franc miērmul, che per prōva l'ons metuda te dròc, ulá che la ie subít arsida a fonz.« — »Chēs n'ie nia,« diš 'l segundo, »je è depēnt na lōntšòft š'che la ie d'inviērn, sula tēila, cun crēps da nēif y da dlacia, tan naturēla, che can ch'on tacà sú 'l chēder te stua, ie arsi 'l termomēter de-bòta gū a vint gradi de frēit.« — »Vo doi sēis bēn doi puere fúseri,« diš 'l tērzo, »ma je bēn è fat 'l retrát a Piere Lul tan spudà che 'l messōva unì 'n polbierer doi jēdēš al'ōna a i fē la bërba.«

Sèpl da Passua.

\* \* \*

'N fēver òva 'n dí urtà a cialè 'm pue' massa te gòt y, cò che la va, fòve-l unì bēn-debò' dala stopa. 'N valgún tèi gēuni se pēnsa d'i tò gū si bōla gran bërba y d' i dè sēura na tēl còta rossa; chi òva giatà, je ne sè ulá je. Pò 'l mēin-i dant al cunvënt di Franciscáneri, sona la ciampanōla y s'en mucia. A udēi na tēl šiessa ie chi puere padri dut sperdui, y 'l mēina de-bòta te liet. L'auter dí, can che 'l fēver se dešēida, veige-l tan de Franciscáneri 'ntēur liet ite, che 'l mēt man a pensè dō še 'l ie 'm pon'de mòrt. I'l damanda, cò che 'l l'à; ēl respuent che 'l ie fēver te tēl y tēl luec. Pu, se pēns-i, 'l à bu tant, che 'l ie unì de cervöl. Ēl 'ntēs n'ie nia bon de la 'ntēder, cò che 'l ie revà iló y se mēt a dubitè. — »Bon«, diše-l, »gīde da mi fēna tlo y tlo, y damandē-la še son iló. Še son iló, pò ne sons je; še ne son iló, pò sons je.« — A cēsa manciōve-l, y sa-η bēn che si fēna ie de-bòta sautēda tel cunvënt a udēi, še bēn che la ne fōva bōna de crēier, che 'l fossa gīt tel cunvënt, a vōster che fin-a-mò nen òve-l mèi mustrà idēa de 'n fē na tēla. — »A,« diše-la, can che la 'l vēiga, »chēs nen ie-pa mi uem ēl, me savōva bēn na granda. La uš semōia bēn 'm pue' la sia, ma 'l òva la bërba longia. — Žēn se fēse-l purtè 'n spiedl y se cunšidra. »Bøl 'm pont,« svēje-l, »je ne son je no.« — La stōria n'ēssa mò giu' no finà, ma sa-η bēn, i Franciscáneri ie da-gnēura stai gēnt maladēta, y 'nši l' à-i tòš tufēda òra cò che la cōssa ie gīta.

S. da Passua.

Usöp anconta 'n dí si cumpère Tòne, che paròva vòster drèt mèl cuntènt; davia de chël 'l damand-l: «Cie ès-a Tòne, che te cèles ca tan dala luna?» — «O,» respuent Tòne, «'l dutór à comandà a mi fèna, che la dèssa gî trèi ònes a bagni.» — «A, cèla, cèla, chës ie-l, pò crèi-i bèn che te savrà rie a stè tan giut zèna fèna», diš inò Ušöp. — «O, tu gran macarón che t'ies, »respuent Tòne, «'l cuntrario ie-l: gî ne me va-la nia, la pèsta, ulá che m'òve bòle tan 'ncunfertà.»

Franz Moroder de Lenert.

\* \* \*

La fèna manda na sèira un a cherdè si uem t'ustaria:

»Vie a cèsa, t'ès ch'l pitl amalà.« —

»O l' vèn-pa bèn mieč.«

»La fèna ie amalèda.«

»Pu, dut cò che ch'l bøl Die uel.«

»Vie, che 'l ie na vacia che fès vadöl.«

»Vède-pa bèn.«

»'L barisöl dal' èga -de-vita strèva.«

»Pò muess-i gî de-bòta.«

S. da Passua.

\* \* \*

Na sèira à-la metù man de m'en dì gû drèt dassèn la fèna, per chël che son revà tèrt. Je stašove mè-drè sentà te liet y scutòve bøl chiet. »Pu,» diše-la 'ngali, »ponde-te pu gû, 'l vèn ite 'n frèit che...« — »'Ntan la perdica iež-uḡ da-gnèura stai sentèi.«

S. da Passua.

\* \* \*

Na sèira m'è-i dešedà dala doi cun na drèta sèit. M'è pessà de gî a me tò 'm pue' de vin y me-l šaudè tel'èga ciauda. Pò l'è-i mešedà cun 'm pue' d'èga; y son gî te stua a me-l böver. La fèna fòva levèda sú pra 'n tøl pitl. Je gèure 'l uš, t'una man la bòza, tel'autra 'l cèir. »Zèn ne diš-i plu nia, diše-la, še te mètes mò man de sautè dala doi da dumán 'ncantèur.« — »Mi bōla fèna! še 'ḡ uel 'nderzè òra vèlc da chiš dis curč, muess-uḡ scumencè cula lum.«

S. da Passua.

\* \* \*

Cater jèdeš fòv-i revà massa tèrt a cèsa; 'l quinto jède m'en à-la bèn dit na drèta musa la fèna. Can che l'à udù che nia ne gōva, diše-la mò: »T'ies bøl 'l maḡer lump dela cura.« — »Dèude-te, n'en ès-a prōpi no giatà 'n mièur?«

S. da Passua.

\* \* \*

'N dí diš segnèur curát, me petàn 'nši cula man su na šabla: »A vo sèis 'n bravo uem, vo.« — »Rušnèda ma 'n'jède cun mi fèna, pò ciaculèis-a.«

S. da Passua.

Usöp y Tòne a messù gī cui saudèies. Da Pasca nen à-i nia pedù gī a cēsa, i fòva massa da lonč. Per i fè na legrēza, s' à pessà i genitori d' i mandè 'm bōl tò de cērn sfumiēda prun, ch' i èbe 'n òto dí da se tripè. Y gā che 'l vèn plu bon-marcià, à dit anda Stina a anda Trèsl: Te pòrte-pa mè via la cērn a tí, pò fēses un pachètl; metón sú na zòdula sui tòč, ch' l-un che ie de Tòne, y ch' l-un d' Usöp. La legrēza fòva bēn granda, can ch' i l' à giatèda, ma i tòč massa pitli. Tòne se-l à finà 'l prim dí 'l sie, y n-ēssa mò majà. Usöp s' en à mò sparagnà 'n tòc. De nuet se pēnsa Tòne: Ue-pa ti-la fè a Usöp; me maje-pa je ch' l tòc, gā che 'l ne l' à majèda. Dò 'l fat nen ie-l cunsēi; laša che 'l brontle. Èl löva sú y mēt man de cri: Dant al dut de tanister d' Usöp, pò te scrin de mēisa, sot-a liet ite, y 'nfin-a-mèi te liet. Nia ne gōva, la cērn nen ie da giatè. L'auter dí à-l durmì plu giut ch' Usöp, pervia che 'l òva durmì puec de nuet. Can che 'l löve, vèige-l, ch' Usöp ie tel lēur de se tajè gū 'n tòc de cēirn. »Mostro, di-ma, ulà ès-a ascundù ti cērn?« — »Pu,« diš 'l maladèt, »ulà-pa auter che te ti tanister.«

A. L.

\* \* \*

Anda Maria, 'm pue' ria š'che duta l'èiles ie, diš 'n dí a Tòne, che ie sta bōl dan-mež-dí a s' en böver 'n chèrt: »Vēgnes-a bōle inò òra d'ustaria; pudēsse pròpi sautè òra dela pōl dala rabia che te me fēses.« — »Je per mi pèrt,« diš Tòne, »n'ēsse-pa nēt nia de-contra.«

A. L.

\* \* \*

'N père òva doi fiōns; cò che la ie, un fòva drèt valènt, y 'nteressà al lēur; l'auter durmiva gēn. 'N dí löva 'l prim a-benēura per gī a cumprè ite zòche ròba. Per strèda giate-l 'n tacuín plēn de zòdules da dieš da tlupè sú. 'L 'l pòrta a cēsa. — Si père tòl 'l tacuín y va a i-l mustrè al auter fi, che fòva mò te liet. »Cēla tlo, frèt, cie che ti fra à giatà da tlupè sú, per chēl che 'l ie levà a-benēura.« — »Caro père,« diš l'auter, »še chēl che se-l à perdù, fossa sta te liet šich'je, ne se-l ēsse-l perdù.«

A. L.

\* \* \*

Fan tèi studēnč, gēuni y de bōna ueia, y na sēira, šiche la garata 'n datrai, gāns mōfun bēn ciantàn, y fašàn na drēta fuera trēs zitá. Vèn ca 'n giandarm y nes svēja per-möz: »Ne sa-vēis-a che 'l ie pruibì de ciantè de nuet a gī a cēsa?« — »Pu scu-sēde, diš un, ne gōn pu no mò a cēsa.« — »Pò pudēis bēn ciantè.«

A. L.

\* \* \*

'N tèt mut diś a si pèr: »Á, ma ce nès cueciun che t'ès.«  
— Si fra, plu maladèt, s'en à 'ntendù, che 'l pèr nen òva nia gën,  
y per i fè na legrèza, diś-el de-bòta: »No, nen ie 'nce vèira no;  
'l 'l à brun.«

A. L.

\* \* \*

Śiche dut passa riēś, diśòva 'n dí un, dut ie vanità; da  
sèira se pond-un sañ y 'nton, y da dumán, can che 'ŋ löva, iez-un  
mòrč.

A. L.

\* \* \*

Un ch'ulòva vòster maladèt, damanda 'n dí 'n sapient per  
'l śachè, can che 'l dèssa marendè; l'auter i respunt: »Se t'ies  
ric, can che t'ues, śe t'ies puere, can che te pòsses.«

A. L.

\* \* \*

'N paur òva udù, che na pèrt de gënt pòrta udlèies a lieġer.  
'N dí che 'l ie ġi te zitá a marciá, vèiġe-l te na buteġa dut tèt  
ròba da udlèies, ròles y spiedli. Ue-pa 'nce je me cumprè 'n  
pèr d'udlèies, se pènze-l, va ite y diś ce che 'l uel. 'L buteghier  
ti 'n pòrta ca na tèt scatola plèina d'ugni sòrt, che 'l dèssa s'en  
cri òra, y 'n liber da lieġer; nòś paur pròva, y pròva: deguni ch'i  
va bèn; 'ngali i sà 'mpò al buteghier che 'l èbe ġint da lèur; 'l va  
da-ugín y vèiġa, che 'l tèn 'l liber ġú-vier. »Ne savèis-a fòrśi nia  
da lieġer?« damande-l. — »Pu,« diś l'auter, »śe savèisse da lieġer,  
nen adurvèss-i udlèies.«

N'auter, che staśòva te 'n vilagio, ulá ch'i òva ciarestía d'èga,  
vèiġa 'n dí te zitá prò un che marciadóva de maśíns, 'nce maśíns  
dal'èga. Chèl che les vènt, ti conta, che na tèt maśín dal'èga o  
pumpa, cò che 'ŋ i diś, mèina 100 litri d'èga al menút. Na tèla  
m'en compr-i, diśe-l. Bon, chèl dala maśíns 'mpermèt mò d'unì  
'nstès a la mèter a ġi, che, sà-ŋ bèn, 'l paur nen à prátiga de tèt  
ròbes. Chèś fòva zèn 'n gran afare per la gënt che n'en òva mèi  
udù. 'N ch'l dí, ch'ie ruà la pompa, s'à-i abinà duč a udèi. —  
Chèl che fòva unì a la mèter sú, damanda 'l paur, ulá che ie la  
funtana da mèter sú la maśín. »Pu,« diś 'l paur, »ś'esse na funtana,  
nen adurvèss-i na maśín.«

A. L.

\* \* \*

Na tèt pitla stòria da zacán, che nes mostra, ce fòrza ch'i  
òva 'nlèuta. 'N grof va 'n dí pra 'n fèver, a fè 'nfrè si ciavàl. 'L  
cunśidra i fières, che 'l fèver i mostra, i tòl ca y i romp 'n doi tòč;  
'nśi à-l fa cun sies 'n-dò-l'auter: »Chiš fières ne vèl nía,« diśe-l.  
Pò à-l mè 'mpò fa ś'che 'l n-èssa ġiatà un che tenissa y laśa 'nfrè  
'l ciavàl.

Can che 'l fòva da pajē — 'l òva da pajē 7 fiēres y 'l lēur —  
i dà-l al fèver 2 tòleri da 3 raineš. Zēn à chēš scumencià a i cialè  
a chiš tòleri, 'n tòl ca un dò l'auter y i romp a mōz gū. »Chiš  
ne vèl ēnche no nia« diše-l al grof. Zēn à-l messù la cunzoder,  
'l grof, che 'l n-à giatà un da plu fòrza, y i à dat 'n luiš-d'òr.

A. L.

\* \* \*

Anda Lēna y bèra Piere ie inò unii a se di 'm pue'. A de  
tèles muesse-l fòter for ēl dè dò. »Cò che la ie,« diše-l, can che  
'l ne sà pu cie di zēna, »dan maridè t'ulòv-i tan bon, che t'esse  
bòl majà, y zēn me mueia, che ne t'è majà.«

A. L.



## Pensieres.

Die me-l perdone,  
Še diš' cò che me sà;  
Die me bastone,  
Še chēl ie falà.

C. D.

\* \* \*

Chi che mēt vèrda, cie che d'autri fēš,  
S'aršuma 'nstēs y se revina la pēš.

C. D.

\* \* \*

Can ch'un miena, che 'l sà assè,  
Ne sà-l plu nia, cie che 'l sà;  
Can che 'l à pò vèlc da fè,  
Prēs dò vēighe-l, che 'l à falà.

C. D.

\* \* \*

'N ambòlt che se vēic mè sè y si parēč,  
Fēš tan che 'n ciavál, che ne tira še 'η spēč.

C. D.

\* \* \*

'N ciavál viēč pòss-uη menè;  
'N chemún che n' uel udēi, ne se laša catrè.

C. D.

\* \* \*

La bònà bales n' a-η drē d' autè,  
La bònà fanciòles no drē de cumandè.

C. D.

\* \* \*

Chi che uel avèi si ròba cò che 'l dēs,  
Muessa fè fant y fanciòla 'nstēs.

A. L.

\* \* \*

Še la 'nvidia vardēssa š'che fuec,  
Custēssa la lēgna puec.

A. L.

\* \* \*

Oswald de Wolkenstein diš:  
Plu gran amór ch'i purtēis ala bōl 'ēiles:  
Plu gran mucies ve farà-les ēiles.

A. L.

\* \* \*

Cul amór passa 'l tēmp,  
Y cul tēmp passa 'l amór.

A. L.

\* \* \*

Še doi ēiles ie únfat bōles, ue-i bon a trame-doves,  
Vēn-pa bēn 'l tēmp, chē te stufes de duta-doves.

A. L.

\* \* \*

A durmì vèd-i je for cun tēma:  
Adam à giatà, 'ntan che 'l durmiva, na fēna. A. L.

\* \* \*

La mutáns de vint ani damanda, cò ch'ēl ie;  
Chēles de trēnta, cie che 'l ie,  
Chēles de caranta, ulá che 'l ie.

A. L.

\* \* \*

'L tēmp cunēš-uη al vēnt;  
'L père a si pitl inuzēnt;  
'L patrón al dò ch'ie si gēnt.

A. L.

\* \* \*



'N inglëiš, šaldi ric, a fa scri sul sas de si fòssa:  
Chël ch'è spendù, è-i abù,  
Chël ch'è dat via, ie inò unì zerúc,  
Y chël ch'è anzà, muess-i piërder.

Fr. M.

\* \* \*

Degún n'ie plu puere che 'l ric, che ie mè ric. Fr M.

\* \* \*

Chi a biešes, à pöves,  
Chi à mutóns, à nevöles.



## Da 'ndevinè.

### I.

Te chiš nuef pitli chèdri ie-l da scri  
ite i zifri: 1, 2, 3, 4, 5, 6, 7, 8, 9, de  
maniera che 'l monta òra t'ugni lingia  
15, a cumpedè:


I. via y ca;

II. sú y gū;

III. a piz a ciantón.

In obige 9 Quadrate sind die Ziffern  
1—9 so einzusetzen, daß die Summe  
jeder Reihe:

1. von links nach rechts,
2. von oben nach unten,
3. diagonal gezählt



15 ergibt.

A. L.

### II.

'N segnëur damanda 'n tël pitl badiòt, che vèrda l'auces,  
tantes che 'l n-à. 'L pitl respuent:

»Še ěsse chēstes, y mò tantas, y mò mōža tantas y mò 'n  
chèrt de tantas, y vo fussais l'aucón, pò n-ěss-i iust 100.« Tantes  
n-òve-l -pa?

A. L.

III.

Doi fanč à na bòza da òt litri de vin da se partì mōža per-un,  
dunque muess-i 'n giatè cater litri per-un. I à mè ch'sta bòza  
da òt litri, una da cinc, y una da trēi; cò fēs-i? A. L.

IV.

Sun-tēt ie-l 7 uciei; 'η 'n stlupēta gū un; tanč 'n rōst-l mò  
la-sú? A. L.



## Soluzi3n de chēl da 'ndevinè tel calēnder dal aā passà:

- I. Dlaci3ns;                      II. Na lītiga;                      III. La chērtēs.  
IV. 'L mēune; che 'l 'mpōia la lumes de dí,  
      'L svedun, chē 'l à 'l cē blanc.  
V. 'L chēul dal lat; la ciazza dai niòc.

